

Mama di Natalee kier mira kico rapportnan di polis ta indica desde 30 di Mei

ORANJESTAD (AAN): Aunke rumornan a sigui circula riba Diamars, atrobe DIARIO tin di mustra cu ningun detencion mas a cay relaciona cu desaparicion di Natalee Holloway. Ya caba DIARIO a raporta esey den su edicion di Diamars mainta.

Indicacion ta fuerte cu e 'enfoque' principal ta sigui riba Joran van der Sloot. Esaki por deduci for di e hecho, cu e dos rumannan Kalpoe ya a worde traslada pa Prison di KIA. Pero Joran keto bay ta deteni na Warda di Polis na Noord, unda Recherche tin acceso mas facil pa interrogacion.

Pues, e interrogacion riba Joran ta sigui non-stop.

E enfoque riba Joran ta haci por lo menos e mama Beth Holloway Twitty contento. El a declara esey Dialuna anochi den e programa di On The Record cu Greta van Susteren riba Fox News Channel. E dama aki di Alabama ta insisti cu Joran sa mucho mas di loke e ta revela te cu awor.

Esey por ta e motibo tambe, di con por lo menos dos revista Tabloid di Merca, esta "Globe" como tambe "National Enquirer" a dedica hopi di nan energia na Aruba

ta core tras di e storia di Joran. Tin indicacion cu nan proximo edicionnan lo contene hopi mas tras di loke Joran a haci te cu awor, incluyendo revelacionnan cu el a yega di haci den pasado riba internet.

MAMA DI NATALEE DI BISHITA NA VAN DER SLOOT

E acontecimiento di mas grandi cu a socede Diamars, sin duda alguno ta e hecho cu Beth Holloway Twitty hunto cu e periodista hudicial Greta van Susteren a acudi na cas di famia Van der Sloot na Montaña, hunto cu un crew di grabacion.

Aki Beth a baha di auto y a acerca e entrada di e cas, y a laga su voz resona. Sorprendentemente Paul van der Sloot (tata di Joran) a habri porta di su cas, y a invita tanto e mama di Natalee como tambe e periodista di Fox cu nan crew pa drenta nan cas. E mama di Joran tambe tabata presente. Aki a combersa pa 90 minuut largo den bista di camera.

ABOGADO DI FAMILIA KIER SA MAS
Mientras tanto, abogado de Souza kende ta representa famia di Natalee Holloway, ta buscando forma pa entabla

un caso sumario, pa asina purba di obliga autoridad local pa divulga mas.

E divulgamento aki mas bien ta pa demostra na famia, ki sorto di prueba nan tin caba acumula den e investigacion aki cu ta bay drenta pronto su di cuatro siman. Aki por pensa cu kizas e famia no ta contento cu e rapidez di e caso, y lo kier mira kico tin caba.

"Mi kier mira e rapportnan di Polis for di 30 di Mei," e mama a declara na prensa. Pero ta bisto cu un Huez lo no tuma decision asina, te ora cu un sospechoso worde acusa oficialmente.

Pero ya caba DIARIO a haya sa, cu algun periodista Mericano tabata cana rond cu rapport di Polis Arubano den nan man! Nan no ta compronde kico tin skirbi na Hulandes, pero tog nan tine. Con bin nan por haya acceso na Rapport di Polis? Esaki por perhudica fuertemente cualkier investigacion.

Normalmente, prensa por haya sa di 'fuentenan' cierto detaye. Pero con bin cu prensa Mericano ta logra di haya full e rapport imprimi riba papel den tur luho y detaye?

SISTEMA DI INTEROGACION

E sistema di interrogacion ta slow of no? Algo ta sigur! E sistema di interrogacion di un sospechoso via di camera sigur ta algo nobo pa mayoria di Recherchenan encarga cu e caso di Natalee Holloway.

Manera ta conoci cu Cuerpo Policial di Aruba a keda atras pa locual ta tecnologia. Gobiernonan tampoco a percura pa Recherche por a sigui curso di avansa relaciona cu caso nan cu lo por presenta manera esun di Natalee.

Semper y cuando nos Recherchenan local tabata usa nan tactica a-la-criollo pa por saca delaster un informe for di e acusado nan dilanti.

Awor cu masha cautela tin cu atende e caso aki ya cu cualkier pregunta for di sla abogado ta bula manera zamuro riba nan ora esaki worde trata den corte.

Esnan cu a bin for di exterior esta Recherchenan Hulandes y FBI cu ta yudando den e caso aki, ta usando e tecnologia moderno cu pa basta tempo caba ta worde poni den practica.

Ta poco siman atras a manda algun polis pa un curso di Recherche na Hulanda cu tin un duracion di 6 luna. Un grupo cu a worde selecta no ta tur a viaha pa

motibo cu e placa cual a worde poni como daggeld no ta recompensa nan gastonan na Hulanda.

Otronan cu si tabata tin facilidad debi cu sea famia a facilita lugar pa hospeda segun DIARIO tin entendi. Ta bin acerca e estilo di FBI den e siglo nobo aki, unda na varios ocasion por a tuma nota di diferente caso con entre otro sospechoso y acusadonan ta worde interroga via e sistema di graba camera, pero esaki ta exige entrenamiento no ta facil pa introduci esaki un dos tres pa nos Recherche criollo nan tin di aclimatiza cu e sistema cual lo ta worde usa na e momentonan aki pa prome biaha den un caso na Aruba grandi por sierto masha complica.

Pero tin pleno confianza cu investigadornan lo yega na e punto culminante y resolve e caso.

MAS AGENTE DI FBI DI ALABAMA

Mientras tanto, dos otro agente di FBI for di Birmingham, Alabama, a yega Aruba pa uni cu esnan cu tey caba. E dos oficialnan nobo aki ta specializa den buscamiento di prueba y procesamento di nan.